

Missen thun kundt —, das die innigin iungfrauenn Margaretha Fawst vnde Justina Lossemel gekawfft habenn czwey schogk groschen guter were in vnserm dorffe Kaßeren gnand uff öre lybe —, welche czwey schog grosschen habenn geczinst dy czwene vnser vndersaßen zcu Kaserenn mit den namen gnand Peter Beycheling vnde Peter Henczschel. Nu hadt sichs begeben, das wir das güdt Peter Beycheling haben abe gekawfft vnde zcu vnserem forwerge zcu Kaseren geschlagen vnde geeygent mit allem rechte zcinßen vnde zcugehörungen, alzo das wir vnde vnser probist sullen jerlichin zcinßenn den obgengnanten iungfrauenn dywele sie lebin czwey schog guter grosschen. Nu seyn die ehegemelten iungfrauen Margaretha vnde Justina fur vns kommen vnde haben gebethen, dass ön die gnanten czwey schog grosschen möchten jerlichen von eyne czinsmanne alleyne werden, also nemelichin von Peter Henczschele ader wer uff die zciit sulch seyn gudt inne haben würde, der vns denne czwey schog güter groschen czinst öber iar ader mehre. Sülcher bethe vnde begerunge haben wir — vorwillet vnde vorgunst, das der gnante Peter Henczschel zcu Kaßeren gesessenn, ader wer uff die zciit sulch seyn gudt in besieczunge vnde inne haben würde, sal jerlichen czinßen czwey schog guter grosschenn den vilgnanten iungfrauen Margarethan Fawst vnde Jüstinen Lossemel dy weyle sy lebenn, eyn schog groschen uff Walpurgis vnde eyn schog vff Martini, an czuheben nach dato disses brieffes, nicht hinder sich, ab die gnanten czinse andere tage zciit haben czü czinßenn, alzo die registere der pröbistye außwyßin, vnde nach vergangenem cziiten vnde tagen öres lebinß so sullen dy gnanten zwey schog groschen widder an vnsern probist kommen ane alles hindernis —. Das alle diße stügke vnde artickele stete vnde veste gehaldin sullin werdenn, vnde zcü meherer sicherheyt habenn wir obenngenannten der probistye vnde der sammelunge sigil vnden an dissen vffenen brieff lassin hengen, der do gegeben ist nach Cristi gebordt vnser herren thwsendt virhundert iar, dor noch in dem acht vnde söbenczigesten iare, ann der heyligen drye könige tage.

Nach dem Orig. wie No. 452 mit den Siegeln des Probstes und des Convents an Pergamentstreifen.

### No. 485. 1478. 15. Mai.

*Das Domcapitel trifft mit dem Kloster zum heil. Kreuz einen Tausch, indem es Zinsen in Oberlommatszsch übernimmt und solche in Meissen, Seebuschütz und Cölln an das Kloster abtritt.*

Wir nachgeschreibinn Ditterich vonn Schonbergk thumprobst, Johannes Salhausenn doctor, techant, Paulus Mündel senior vnnd scolasticus, Nicolaus Hildebrandi archidiaconus Nisicensis, Nicolaus Puschmann, Marcus Schulteti doctor, probst zcum Hayn, Heinricus Mellerstat doctor, thumheren vnnd ganz capittel der kirchenn zcu Meyssenn bekennen —, noch dem vnnd wir mit dem werdigen ern Nicolao Küne probest vnnd der togentsamen frawen Agatan Bernsteyns epticzchyn, Anna Reynspurgs priorissyn vnnd samlung des closters zcum heyligen Creucze von wegenn eyns schogß vnnd czweyvndvircig groschen jerlicher czinsse in dem dorff zcu Ober-Lompnicz bey Nauendorff gelegen mancherley handel gehabt haben, do mit dy iczt gnan-